

佛道教三經解 與 雪 图 号



佛道教經解



佛遺教經解科判及目錄



佛遺教經解

歸命常住大悲尊應病

應病與藥權實法

亦禮天親造論主

爲順初機重解釋

久住。滅除凡聖過,成就自他利。」噫!此經奧旨,菩薩誠盡之矣! 下, 述曰:天親菩薩,以七分建立所修行法,釋此經義。推徵精密,開誘殷勤,萬古以 無能更贊一辭。觀其言曰:「爲彼諸菩薩,令知方便道。 以知彼道故, 佛法得

末世鈍根,讀菩薩論,或解或不解,或昧或明,雖有源師節要、宏師補註,仍亦攝

機未徧。今不揣庸愚,輒復爲解。庶幾下里巴人,易爲賡和而已。

人。 今初

將

釋此經,大分爲二:初題目,二入文。

初中二:初正釋題

,二出譯

佛遺教經解

明古吳蕅益釋智旭述

-

佛遺教經

「佛遺教」三字,是別名。「經」之一字,是通名。就別名中,佛爲能說之人,遺

教爲所說之法。人法雙標,能所並舉也。

無不究竟 佛翻爲覺 ,故名爲佛。又在夢之心,心不可滅,名爲本覺;從夢初醒,知夢本空, 。衆生長劫在夢;佛斷無明,如從夢覺。旣自覺已,又能覺他,覺一切法

名爲始覺;旣從夢醒,惟一覺心,更無二心,名究竟覺。

言入滅,令生悲戀。又以大悲無盡,曠濟無邊,故雖示滅,仍留遺敎,接引後昆。 天,水清影現,水濁影亡。是故佛實常住,未嘗滅度,特爲我等一輩濁惡凡夫,唱 道,爲我等師。又因我等長迷不覺,故於無生無滅性中,示有生滅 此之覺性,含靈本具,無始無終。釋迦牟尼,不過先得我等之所同然,所以示成佛 。譬如月輪在

之,則是法子;不依所囑,則是大逆不孝者矣。 遺」者,貽留。「敎」者,訓誡 。猶儒書所稱顧命,亦人世所謂遺囑也。依而行

「經」者,訓法、訓常,具如餘處廣釋。

亦名佛垂涅槃略説教誡經

「垂」者,將入未入之時。

「湼槃」者,離過絕非,不生不滅之義。而有四種:

、自性清淨湼槃。即一切諸法本來常寂滅相 ,佛與衆生平等無二,不增不減。此

則不論出入。

二、有餘依湼槃。謂三乘已斷見思子縛,而所依果縛,身心尙在。此約證果時入。

三、無餘依湼槃。謂三乘灰身泯智,復歸無名無物本體。今正約此論垂入也

四、 無住湼槃。 謂諸佛菩薩 ,有智慧故,不住生死;有慈悲故,不住湼槃。不住生

死,故能非滅示滅;不住湼槃,故能非生示生。

佛久證此無住湼槃,今爲有緣度盡,故示垂入無餘湼槃,實不同二乘之一滅永滅

也。又湼槃有三義·

一、性淨湼槃,即法身理體。此則無出無入。

圓淨湼槃,即般若。斷惑究竟,冥合性眞。此則一入永入。

三、方便淨湼槃,即解脫。方便示現,起諸應化。此則數出數入。

若以三義對上四種者:性淨 ,即自性清淨湼槃,亦即無住湼槃之體;圓淨 ,即無住

湼槃之相;方便淨,即無住湼槃之用。其有餘依、無餘依二種,若在二乘分中 ; 則

沙無明及變易也。若在如來分中,則攝屬方便淨。初成道時,示同二乘之有餘依; 攝屬圓淨 。以是圓淨之少分故,但顯偏眞,未顯俗諦中諦;但淨見思分段,未淨塵

今滅度時 ,示同二乘之無餘依也

略說」者,對平日廣說,此爲要略;又對大機所見大般湼槃經,此爲簡略故。

二出譯人

姚秦三藏法師鳩摩羅什譯

姚興建國,亦稱爲秦,故名「姚秦」。

三藏」者,經律論也。經詮一心,律規三業,論開慧辯。以茲三學自軌軌他,名

爲「法師 0

鳩摩羅什」,此云童壽,童年時便有耆德故。翻梵成華,名之曰「譯」。

者 釋迦牟尼佛 7 皆已度訖 ,初轉法輪 0 於娑羅雙樹間 ,度 阿若憍陳如;最後説法 7 將入湼槃。是時中夜 ,度須跋陀羅 ,寂然無聲 。所應度 7

子略説法要

四諦法 略同 慈悲 有異 梵語「阿若」 煩惱業苦三障,名之爲「輪」。陳如聞此法故,見四諦理,出生死海,名之爲度 佛成道已 釋迦 佛以自心中所悟四諦之法 0 , 具此總別二相,名之爲佛,義如前解。論判此句,是法師成就畢竟功德也 故論中稱爲別相;約名,則諸佛理同 不住無爲 , 輪 說法四十九年,度人無量,今舉初後,以括始終。初在鹿野苑中 , 此翻能仁,佛之姓也。「牟尼」,此翻寂默,佛之名也。約姓 僑 , 陳如最先得度;乃至湼槃會上, 此翻爲解,亦翻無知。解者,明見四眞諦理;無知者,根本智證見 ,此相與二乘全別;「寂默 ,度入一切衆生之心,名之爲「轉」 」則具大智慧 , 故論中稱爲總相 須跋陀羅最後得度 ,不住有爲 又「 0 ;此法能摧衆生 能仁」 言 , 此相 轉法輪 7,則事! 與二乘 則具大 ,三轉 相

好賢 後說法」二句 聞 諦 八聖道 理,不存能所故也。「憍凍如」,此翻火器,乃尊者之姓。「須跋陀羅」, 或翻善賢 , 遂得 論名爲開法門成就畢竟功德 初果 。本是外道,住鳩尸 ,因即出家 0 嗣聞 ,那城。年一百二十,聞佛將湼槃, 四 諦 ° , 成 阿羅 度阿若憍陳如」 漢 。是中「 初轉法 及一 度須跋陀羅 輪 方往佛 及 此翻 「最 所 0

二句,論名爲弟子成就畢竟功德也

句 常。繇大小機異,故異見耳。「中夜」,即表中道。大乘以非榮非枯爲中道,小乘 果自相 以離斷 大總相 榮一 所應度者,皆已度訖 爲 枯 離常爲中道也 因果自相成就畢 成就畢竟功德也 ,上枝相合 是時 中 夜 。「寂然」者 ,下根相連 , 一竟功 0 ___ ,明佛智鑒機 是總自相 娑羅」, 德 0 謂 , 以表 ; ,心行處滅 雙樹 此翻 寂然無聲 四德 , 堅固 間 恆無忘失,得益之衆 , 破於 0 0 ,是因自相 無聲 雙樹 八倒 是果自相也。 一者, 0 者 或惟見一 ; _ , 將入湼槃 言語道斷 此樹四方各二, ,算數莫窮 雙, 「諸弟子 即表 <u>__</u> 論名 , 論 破 是因共 各各 名爲 者 於斷 此 几

上首眷屬人位差別。「法要」者,世出世間法位差別。論名此句爲分別總相成就畢

竟功德也。

夫垂入湼槃 ,則無復再會;已在中夜,則爲時不多,故取要略說,以作最後警策

真不啻一字一血矣!讀者可弗思乎!

知此則是汝等大師,若我住世,無異此也 汝等比丘,於我滅後,當尊重珍敬波羅提木叉。如誾遇明,貧人得寶。當 淨戒,次明方便遠離清淨戒 治 邪業法要 正宗分爲二:初 , 二對治止苦法要, 三對治滅 明共世間法 , 三明戒能生諸功德, 四說勸修戒 要,二明不共世間法要。 煩惱法 要。 初 又 四 利益 : 初中三: 初 0 明 根本清 今初 初 對

故;二者,示摩訶衍方便道,與二乘共故;三者,比丘爲四衆之首,舉其首以該四 之遺教,通誡一切四衆弟子,而經中處處獨舉比丘者,亦有三義:一者,示遠離相 「比丘」 , 此翻除饉 , 即 福 田之稱也。又含三義 ··一怖魔,二乞士,三破惡 然佛

衆,亦皆同遠離行故。

言「滅後」者,即示現遺教義 。「波羅提木叉」,此翻保解脫,亦翻別別解脫 亦亦

佛遺教經解

遇明」;得度空無善根障,故云「如貧得寶」。 以戒為師 云處處解脫 。不能持戒,則同堂猶隔萬里;苟能持戒,則百世何異同時 0 此即是不盡滅法 。依此法身,度二種障: 佛在世時 得度煩惱暗障 ,以佛爲師 , 0 故 金口誠言若 佛滅 云 度後 如闇

奈何捨此別求 明方 便遠 離清淨戒

次

此

應作 自活 及諸財寶 持淨 占相吉凶 戒者 0 7 當自端 不得參預世事 ,仰觀星宿 ,皆當遠離,如避火阬;不得斬伐草木,墾土掘地。合和湯藥 ,不得販賣貿易 心 7 正念求度;不得包藏瑕疵, ` 7 通致使命 推步盈虚 , 安置 田宅 0 y 呪術仙藥 歷數算計 ,畜養人民 7 7 皆所不應 結好貴人 顯異惑衆;於四供養 ` 奴婢 0 7 、畜生;一 節身時食 親厚媒慢 切 , 7 清淨 種植 知量 7

是中 應畜積」,是護戒令不同外道損智 有二段文:從初至「 墾土 掘地 , 是護戒令不同凡夫增過;從「占相」至「不

知足

趣得供事

,不應畜積

0

是積聚增過。十皆當遠離,如避火阬,是不覺增過。十一不得斬伐草木,墾土掘 得安置田宅,是所居業處求多安隱增過。五不得畜養人民,是眷屬增過 或有爲衆許開者 地,是不順威儀及損衆生增過。此十一種增過事,修行菩薩宜速遠離,不應親近 不得畜畜生,是養生求利增過。八不得一切種植,是多事增過。九不得畜諸財寶 屬 貿易,是交易求利增過。若依世價,無求利心,不犯。賣買法式,如律廣說。四不 初中凡十一事:一不得販,是方便求利增過。二不得賣,是現前求利增過。三不得 非同意者。六不得畜奴婢,是難生卑下心增過。以向此等人,易生我慢故 ,具如律說 ,大須精審也 。此示外眷 。七 0 ,

第二文中,先總遮五事,次明三處波羅提木叉。

計 先五事者:一不得合和湯藥,二占相吉凶,三仰觀星宿,四推步盈虛,五歷數算 。凡此皆屬邪心求利,不達正因緣法,故遮止也

障。三清淨自活,對治共相追求障。四不得參預世事,是自性止多事。五不得通致 次身處波羅提木叉,有五句:一 節身,對治他求放逸障 。二時食 ,對治內資無厭足

使命

,是自性尊重

,不作輕賤事。

邪藥作世辯不正語。即「呪術仙藥」是也。二者,依邪人語。謂與族姓同好,多作 次口處波羅提木叉,有二種邪語不應作:一者,依邪法語。謂邪術惱衆生語,及依

鄙媟語;及親近族姓,多作我慢語。即「結好貴人,親厚媟慢」是也。

二「 正念求度 」,對治邪思惟障,能自度下地故。三「 不得包藏瑕疵 」,不汙淨 次意處波羅提木叉,有六句:一「當自端心」,對治多見他過障,不犯自淨心故

戒,不受持心垢故。四「不得顯異惑衆」,遠離無緣顯己勝行,令他不正解故。五

量;若入道分 於四供養 , 知量知足」,對治於受用衆具中無限無厭足障。若入三昧分 ,則知足故 0 四供養 ,謂飲食、衣服、臥具、醫藥也。六「趣得供 7,則知

事,不應畜積」,遠離貪覆心貯積衆具故 0

以上方便遠離凡夫及外道過,則令戒身淸淨,堪紹如來淨法身也。 三明戒 能 生諸功德

此則略説持戒之相。戒是正順解脱之本,故名波羅提木叉。因依此戒,得

生諸禪定,及滅苦智慧。

此戒爲本。因戒生定,因定發慧,定慧無不從戒生也。 說。繇此戒故,能度身口意惡彼岸,成就三業解脫。是故行人若欲正順解脫,必以 戒體惟一, 所謂無作;戒相至多,所謂五篇七聚。今舉恆情最易犯者言之,故名略

四說勸修戒利益

戒,諸善功德皆不得生。是以當知,戒爲第一安隱功德住處 是故比丘,當持淨戒,勿令毀缺。若人能持淨戒,是則能有善法;若無淨

隱功德住處」,是勸住安隱處,勿住不安隱處也。初對治邪業法要竟 便 是中凡有五勸:一「當持淨戒」,是勸不失自體。二「勿令毀缺」,是勸不捨方 l。三「能有善法」,是勸常集功德。四「若無淨戒」等,是勸知多過惡 。五「安

對治。 二對治止苦法要三:初根欲放逸苦對治,二多食苦對治,三懈怠睡眠苦 初中二:初根放逸苦對治,二欲放逸苦對治。 今初

汝等比丘,已能住戒,當制五根,勿令放逸,入於五欲。譬如牧牛之人,

根賊 也;亦如惡馬,不以轡制,將當牽人墜於阬埳。如被劫賊,苦止一 執杖視之,不令縱逸,犯人苗稼。若縱五根,非唯五欲將無涯畔, 禍 7 殃及累世。爲害甚重,不可不慎!是故智者制而不隨 ,持之如 世;五 不可制

賊 ,不令縱逸;假令縱之,皆亦不久見其磨滅 0

聲香 初 已能住戒」,指前根本、方便二種言之。以下正明護根法要,凡有三喩: 味觸 當制五根」下,是牧牛喩。先法,後喩。五根,謂眼耳鼻舌身。五欲,謂色 0 牛 , 喻五根;牧人,喻比丘;執杖,喻戒念;苗稼,喻諸善功德 ,即定

慧等法也。

念;阬焰 次,「若縱五根」下,是惡馬喩。亦先法,後喩。惡馬,亦喩五根;轡制,亦喩戒 喻三惡道 。蓋縱五根 ,不惟妨善,又必墜惡,故云:「非唯五欲,將無

涯畔」也。

非制而不隨,豈得名爲智者?又假令縱之,不久磨滅。如刀刃上蜜,不足一餐,小 如被劫賊 下, 是劫賊喩 。先喩 ,後法。「 殃及累世」, 其禍 甚 於劫 賊 ,倘

二欲放逸苦對治

之, 怨賊、大火越逸,未足喻也。譬如有人,手執蜜器,動轉輕躁, 蜜,不見深阬 此五根者,心爲其主,是故汝等當好制心。心之可畏,甚於毒蛇 無令放逸。 。譬如狂象無鈎 縱此心者,喪人善事;制之一處,無事不辦。是故比丘 ,猿猴得樹,騰躍踔躑,難可禁制 。當急挫 、惡潤 但觀於 7

當勤精進,折伏汝心。

無二念三昧;二者,輕動不調障,能障調柔不動三昧;三者,失諸功德障,能障起 言「好制心」者,應知此心有三種三昧相,有三種障法:一者,心性差別障 五根是色法,頑鈍無知,依心而轉,故皆以心爲主。所以欲制五根,莫如制心 ,能障

文中「心之可畏」等,先明心性差別障。貪分煩惱吸噬善根,過於毒蛇;瞋分煩惱 吞害善根,過於惡獸;癡分煩惱損滅善根,過於怨賊;等分煩惱焚燒善根 ,過於大

多功德三昧

四

唯緣 根受五塵樂 修一切行時,困苦不能成就障礙。) 「狂象無鈎」, 火越逸 現世六塵 。故云「未足喩也」。次「譬如有人」下,明輕動不調障。「蜜器」,喩五 ° 0 「不見深阬 動轉輕躁 」,喻不知未來障礙 , 喻轉識隨逐諸根 ,念念不定。「但觀於蜜」 0 喻心無三昧法所制。「猿猴得 障礙有二種: 生處障 , 礙 喻六識 ;

樹 ,喩心緣六塵境生染。故當急挫,令入調柔不動三昧也。

相 次「 ; 縱此 無事不辦」句,示起多功德三昧相;「精進折伏汝心」句,示調柔不動三昧 心者,喪人善事」,明失諸功德障 。次「制之一處 」句,示無二念三昧

相

二多食苦對治

饑渴 惱 汝等比丘,受諸飲食,當如服藥,於好於惡,勿生增減,趣得支身 , 無得多求,壞其善心。譬如智者,籌量牛力所堪多少,不令過分,以 0 如 蜂 探 華 7 但取其味 ,不損色香;比丘亦爾 ,受人供養 趣 ,以除 自 除

竭其力。

減」,是好惡平等觀。三支身除饑渴,是究竟對治觀 多食能障三昧 ,故以五觀治之:一「當如服藥」,是受用對治觀。二「 。四「如蜂採華」等,先喩 勿生增

後法,是不損自他觀。五「譬如智者,籌量牛力」等,是知量知時觀也

藥以療病,食以療饑 趣 者, 裁取 。「支」者,支持 ,苟可療饑則已,奈何於好便貪心增噉、於惡便瞋心減受耶? 0. 蜂」喩比丘,「 華」喩供養 , 味」 喻借此

牛能負重,然所負過分,其力則竭;喩比丘雖爲人世福田,然貪受多供,則其道自

修道除惱,「色香」喻自他善心。貪食多求,旣損自三昧善,亦損檀越善心也

敗矣。

三懈怠睡眠苦對治

眠,不自警寤?煩惱毒蛇睡在汝心,譬如黑蚖在汝室睡,當以持戒之鈎早 燒諸世間 經,以自消息。無以睡眠因緣,令一生空過,無所得也。當念無常之火 汝等比丘 ,早求自度 ,畫則勤心修習善法 ,勿睡眠也。諸煩惱賊常伺殺人,甚於怨家 ,無令失時;初夜後夜 ,亦勿有廢。中夜誦 ,安可睡

嚴,最爲第一。慚如鐵鈎,能制人非法,是故常當慚恥,無得暫替。若離 摒 除之。睡蛇既出,乃可安眠;不出而眠,是無慚人!慚恥之服 ,於諸莊

慚恥

7

則失諸功德。有愧之人,則有善法;若無愧者,

與諸禽獸無相異

也。

失時 滅 眠 亦二:一者 初觀察對治中,無常有二:一者,一期生滅,爲麤;二者,念念生滅,爲細。世間 至「不自警寤」,是觀察對治;二從「煩惱毒蛇」至「無相異也」,是淨戒對治 然此睡眠,從三事起:一從食起,二從時節起,三從心起。經中「勤修善法,無令 心 , 懶惰故懈怠,身悶重故睡眠。此二相須,共成一苦。障於定慧,令不得生 無可 '」,是對治從食所起睡眠;「初夜後夜,亦勿有廢」等,是對治從時所起睡 當念無常之火」以下,皆對治從心所起睡眠。復有二意:初從「當念無常 停留 ,三界依報 故如火燒 ,是器世間;二者, 。且愛見二種煩惱 ,約三界九地,則見有八十八使 六道正報,是衆生世間 依 正皆歸磨

八十一品,無不足以傷法身、戕慧命,故尤甚於怨家。如此觀察警寤,名觀察對治

於禽獸,正在此耳!可弗勉乎!二對治止苦法要竟 種子未斷而輒安眠 可安眠 永滅 畏 次淨戒對治中 希聖賢,名爲無慚 鈎」者,木叉戒,能防身口;定共戒,能伏心惑;道共戒,能斷心惑。具此三戒 (,猶如黑蚖,不起則已,起必殺人法身慧命。自非持戒之鈎,何能摒除?言「戒 八識田中煩惱種子,名爲「睡蛇旣出」。從此所作已辦,不受後有 」。是故阿羅漢斷心眠已,不斷食起時節起眠,以彼眠不爲葢故 ,謂煩惱雖不現行時,亦未嘗不眠伏在汝藏識心中。而此煩惱毒害可 ;不恥卑下,名爲無愧。慚愧二善心所,起必同時。人之所以異 ,則不知尊重己靈,名爲無慚;不知羞己過惡,名爲無愧。又不 0 ,名爲「乃 今若煩惱

Ξ 一對治滅 煩惱法要三:初瞋恚煩惱障對治,二貢高煩惱障對治, 三諂 曲

煩惱障對治。 今初

汝等比丘,若有人來節節支解,當自攝心,無令瞋恨;亦當護口,勿出惡 0 若縱恚心,則自妨道,失功德利。忍之爲德,持戒苦行所不能及。能

佛遺教經解

之人,而懷瞋恚,甚不可也。譬如清冷雲中,霹靂起火,非所應也 無過瞋恚。白衣受欲,非行道人,無法自制,瞋猶可恕;出家行道,無欲 世,人不喜見。當知瞋心,甚於猛火,常當防護,無令得入。劫功德 名入道智慧人也。所以者何?瞋恚之害,則破諸善法,壞好名聞 行忍者,乃可名爲有力大人。若其不能歡喜忍受惡罵之毒如飲甘露者,不 ,今世後 賊

文有六節:

初、「若有人來節節支解」,是舉所忍之境以重況輕。支解尚在所忍,餘諸逆境何

足介懷?

次、「當自攝心」等,正示堪忍之相。「無令瞋恨」,則身意淸淨;「勿出惡

言」,則口業淸淨也

三、「若縱恚心」等,明不忍之失。「自妨道」者,不能自利;「失功德利」者

不能利他。恚心一起,二利俱喪,甚明其不可縱也。

四、「忍之爲德」等,深歎勝力,以勸修行。蓋持戒者,未必能忍辱;忍辱者,決

我心而持戒。則報僅在人天;以無我而行忍,便成出世大道。犯而不校,譬如海闊 無不持戒 。所以六度之中,戒居第二,忍居第三。以前不兼後,後必具前故也。以

天空,一任鳶飛魚躍,故名「有力大人」。

功德 五、 之因,後世無二利之果 念瞋心起,百萬障門開。破諸善法,何能自利?壞好名聞,何能利他?今世無二利 釋迦眞善知識。設不於惡罵作甘露想,不能歡喜忍受,便是愚癡,未聞道故。況一 成我忍力 若其不能 如豬揩金山,金則愈光;石磨良劍 」等,重明不忍之過,以誡行人。甘露,是不死之藥。因他惡罵 ,誰當喜見之者?所以欲護自利善法 ,劍則愈利 。所以歌利 ,當防瞋火;欲護利他 、調達 , 皆是

六、一 過:一者受欲,欲與瞋相爲表裡;二不行道,無善法以制心,故瞋猶可恕。 人造罪 ,是其分內,不足深責也。出家行道無欲,如淸冷雲,豈容懷瞋恚心 白衣受欲」等,結況不應。從人至六欲天,未入道者,皆名白衣。彼有二 所謂俗 如起

,

當防瞋賊也

佛 遺教經解 霹靂火耶

二貢高煩惱障對治

如是,若起憍慢,當疾滅之。增長憍慢,尚非世俗白衣所宜,何況出家入 汝等比丘,當自摩頭,已捨飾好,著壞色衣,執持應器,以乞自活,自見

道之人

,爲解脱故,自降其身而行乞耶

Î

役 佩 初中,有五句對治:一「當自摩頭」,則無冠冕以嚴首。二「已捨飾好」,則無劍 文有二節:初「汝等比丘」下,正設對治;二「增長憍慢」下,較量不應 以飾 。五「以乞自活」,則無帑藏以積財。故應用智慧常自觀察, 身。三「 著壞色衣」,則無五彩以煥服。四「執持應器」,則無僮僕以供 設起僑慢 ,便應疾

器」, 壞色衣」,即三種袈裟及一切下裙坐具等,皆用青、黑、木蘭三種壞色。「應 即鉢多羅 0 體 、色、量三,皆悉應法。體惟瓦鐵二物,色則熏如鳩鴿 ,量乃

疾滅除之也

次文舉白衣較量,白衣尙不宜憍慢,況求解脫者耶!

隨腹大

小小也

汝等比丘,諂曲之心,與道相違,是故宜應質直其心。當知諂曲但爲欺

誑,入道之人,則無是處。是故汝等,宜當端心,以質直爲本。 亦欺誑他人,決非入道者所有也。直心是道場,心言直故 逢迎希合之言,名諂 ;隨境逶迤之念,名曲。諂則不質,曲則不直 ,永無諸委曲相 |。祇爲自欺誑 設非正

念真如,豈得名「端心」哉?初明共世間法要竟。

德 二知足 明不共世間法要,謂成 功德。三遠離 功德 0 就出世間大人功德也。文分爲八:初無求功 四 不疲倦功德。五不忘念功德。 六禪定功

0

七智慧功德。八畢竟功德

0

今初

部 曲 則無 事有餘,常無不足。有少欲者,則有湼槃。是名少欲 汝等比丘,當知多欲之人,多求利故,苦惱亦多;少欲之人,無求無欲 以求人意 此患。直爾少欲,尚宜修習,何況少欲能生諸功德!少欲之人 ,亦復不爲諸根所牽。行少欲者 ,心則坦然 ,無所憂畏 ,則無 觸

文有五種所知覺相

知覺障相 。謂「 多欲」是煩惱障,「多求」是業障,「苦惱亦多」是報障也。

二知覺治相。謂「 無求無欲,則無此患」也。

五知覺果成就相。謂「心則坦然」,故法身成就;「無所憂畏」,是般若成就; 牽,是無苦障。蓋眼根牽人受色,乃至身根牽人受觸,令人不得自在,是大苦故 四知覺無諸障畢竟相。謂無諂曲 三知覺因果集起相。謂少欲無患,已應修習,況能生諸功德,成就無量聖善法耶 ,是無惑障;無求人意,是無業障;不爲諸根所

觸事有餘,常無不足」,是解脫成就。三德具足,名大湼槃。是知少欲爲因,湼

槃爲果也。

二知足功德

者,雖富而貧;知足之人,雖貧而富。不知足者,常爲五欲所牽,爲知足 足之人,雖卧地上,猶爲安樂;不知足者,雖處天堂,亦不稱意。不 汝等比丘,若欲脱諸苦惱,當觀知足。知足之法,即是富樂安隱之處 知足 。 知

者之所憐愍。是名知足。

前無求功德 ,是遠離他境界事;今知足功德,是於自事中遠離也。

文中,欲脱苦惱,是對治苦因果;富樂安隱,是復說淸淨因果

牽與憐愍對辨,是約二法(無自利、有自他利)示現差別。一則常爲五欲所牽,是 次地上與天堂對辨,是約二處示現差別;又富與貧對辨,是約二事示現差別 ?;又欲

無自利:一則五欲不牽,是有自利,又能憐愍不知足者,是有利他也。

三遠離功德

衆惱;譬如大樹,衆鳥集之,則有枯折之患。世間縛著,没於衆苦,譬如 天所共敬重。是故當捨己衆他衆,空閒獨處,思滅苦本。若樂衆者,則受 汝等比丘,欲求寂靜無爲安樂,當離憒鬧,獨處閒居。靜處之人,帝釋諸

老象溺泥,不能自出。是名遠離。

文有三門攝義:一自性遠離門,體出故 ,示現四種對治

謂「寂靜無爲安樂」,對治我相執著障。寂靜,即法無我空;無爲,即無相空;安

樂,即無取捨願空也。

當離慣鬧」,對治我所障。五陰亂起,無有次第,名慣鬧也。

獨處閒居」,對治彼二無相障。謂我及我所,本自無相,今修三三昧,顯無相

理,彼障隨滅也

也。 二修習遠離門,方便出故。「己衆」,謂五陰心心所法。「他衆」,謂師徒同學 帝釋諸天所共敬重」, 對治無爲首功德障。靜處是可重法,於諸善法最爲首故

空閒獨處」,如法而住,是方便慧成就。「思滅苦本」,遠離起因,是善擇智成

0

就也。

此諸見集生,喻招枯折之患。又因見成業,因業招苦,故喻如老象溺泥,不能自 心所法,此約己衆言之。大樹,喩比丘;衆鳥,喻同學弟子等,此約他衆言之。從 三受用諸見門, 常縛故 。謂「樂衆者,則受衆惱」。大樹,喻第六識 ;衆鳥 ,喻諸

出。

老

,譬觀智衰微,即是惑障。象身重大,譬縛著情厚,即是業障。溺泥,譬沒

四不疲倦功德

則能 汝等比丘,若勤精進,則事無難者,是故汝等當勤精進。譬如小水長流, !穿石。若行者之心數數懈廢,譬如鑽火,未熱而息,雖欲得火,火難

可得。是名精進

0

勤則不惰,精則不雜,進則不退。所以三乘聖果,剋獲無難,不同外道無益苦行 也。次以小流穿石,喻恆不休息之功。鑽火數息,喻懈怠失念之過。如文可知

五不忘念功德

强,雖入五欲賊中,不爲所害;譬如著鎧入陣,則無所畏。是名不忘念。 則不能入。是故汝等,常當攝念在心。若失念者,則失諸功德。若念力堅 汝等比丘 善思惟行,即求善護。三如法修行,即求善助。此三行亦名三慧。慧以照了爲義 此不忘念,是一切行上首。言一切行者,略說三種:一聞法行,即求善知識。二內 ,求善知識 ,求善護助,無如不忘念。若有不忘念者,諸煩惱賊

漏器雖受而失。無修行,如穢器雖不漏失,穢不可用。今有不忘念,則有三行 行以進趣爲義 三行者,能破無始煩惱怨賊,是故常當攝念在心;即著堅鎧入陣,則不被賊害,而 。照了進趣,悉繇不忘念也。無聞行,如覆器不能受水。 無思行 0 有 如

六禪定功德

能殺賊矣!

塘;行者亦爾 等,常當精勤修習諸定。若得定者,心則不散。譬如惜水之家,善治隄 汝等比丘,若攝心者,心則在定。心在定故,能知世間生滅法相 ,爲智慧水故,善修禪定,令不漏失。是名爲定。 0 是故汝

攝心,謂善巧方便,訶棄下地心行,便能次第證入諸禪,乃至出生種種三昧也。心

旣在定,則如杲日當空,明照萬象,故即能知世間生滅法相

言精勤者,對治三種懈怠:一精勤修習節量食臥,調出入息;對治不安隱懈怠

精勤修習覺知諸定,有通慧功德,能盡苦源,及能成就大希有事;對治無味懈

三精勤修習觀察生老病死苦,及四惡趣苦我未能離 ;對治不知恐怖懈怠

繇修習此三對治已,心則不散。無所對治,便能發無漏慧,斷惑證果也。舉喩合

法,在文易知。

七智慧功德

惱樹之利斧也。是故汝等,當以聞思修慧而自增益。若人有智慧之照 度老病死海堅牢船也,亦是無明黑暗大明燈也,一 無天眼 能得解脱 汝等比丘 7 而是明見人也。是名智慧 , 0 若不 若有智慧 爾者 ,既非道人 ,則無貪著。常自省察,不令有失,是則於我法中 ,又非白衣,無所名也。實智慧者 切病者之良藥也,伐煩 7 則是

若有智慧,則無貪著」,是標實慧離障功德。謂遠離眞實義處障,及世間事處障

故。

繇斷迷理無明 ,故六七二識,不貪著第八識之見分以爲我法,是名遠離眞實義處

障。

繇斷迷事無明,故前六識,不於六塵境界而生貪著,是名遠離世間事處障也

今既出家,又無四慧,進退咸失,故無所名也。次以四喩,喻實智慧。見苦諦智 謂繇三慧 常自省察,不令有失」,是總勖增益聞思修慧。 ,得證實智慧也。 增益三慧以證實慧 ,乃名道人;未曾出家 「是則於我法中 能得解脫 ,乃名白衣

如堅牢船

;斷集諦智,如大明燈;證滅諦智,猶如良藥;修道諦智,猶如利斧

念。 諦理,發無漏實慧,證四道果。因中三慧,未具天眼;慧解脫人,亦無天眼, 四諦分明 然實智難證 觀行位中 ,不墮邪見,則是明見人矣!且約藏教義解如此,通教例知,以是三乘共 ,故必當以聞思修慧而自增益。 , 思慧增益,得入煖頂忍世第 名字位中,聞慧增益,得入停心別總相 一法 。相似位中,修慧增益 , 得 見四聖 然皆

八畢竟功德

方便故

捨離亂心戲論,若汝欲得寂滅樂者,唯當善滅戲論之患。是名不戲論 汝等比丘 ,種種戲論 7 其心則亂 ,雖復出家 ,猶未得脱 0 是故比丘 ,當急 0

上來七種功德 ,皆是長養方便功德 ;此示自性遠離 ,非對治法,故名畢竟功德也

滅樂 真如湼槃,本性淸淨,言語道斷,心行處滅 。初果得實智慧,見四聖諦,分別煩惱雖已永斷,而三界九地八十一品思惑 ,本非戲論所行境界,繇戲論故,違寂

熏習所成,令心擾亂,不契真常,是故當急捨離戲論

,

乃得湼槃

皆是無始名言戲論

言「善滅」者,即以所得四諦實慧,重慮緣眞 寂滅之樂 ,數數觀察,淨除業識種現,令其究 ,乃非

等 邊即 戲論 墮絕言見 說權說實 竟不生也。此亦且約三藏義解,若開顯者,眞居事外,仍是戲論;即事恆眞 ,不作 中 。又即 乃非戲論 ,說本說跡,亦皆戲論;觀心若起,本跡俱絕,乃非戲論。又唯貴默然 ,仍屬戲論 解 空不具,仍是戲論;中道不空,乃非戲論 ,不作一解,不作亦一亦二解,不作非一非二解,乃非戲論也。已上 。又對權明實 ;知四句皆不可說,有因緣故亦可得說 , 仍帶戲論 , 開權顯實 。又離邊立中 , 無麤非妙 ,說與不說 , , 仍是戲論 乃非戲論 , 性 自 平 ; 即 。 又

正宗分竟

三流通分爲四:初勸修流通,二證決流通,三斷疑流通,四囑付流通。

今初

悔。 聞之不行 處靜室,念所受法,勿令忘失,常當自勉,精進修之,無爲空死,後致有 益,皆已究竟 汝等比丘,於諸功德,常當一心,捨諸放逸,如離怨賊。大悲世尊所説利 我 如良醫,知病説藥,服與不服,非醫咎也。又如善導,導人善道, ,非導過也。 ,汝等但當勤而行之。若於 山間 ,若空澤中,若在樹 開

也。「常當一心」者,依第一義心而修也。「捨諸放逸,如離怨賊」者,遠離一心 諸功德 , 指正宗分中共世間法要三種對治功德,及不共世間法要八種大人功德

相違行也。

所說利益

,皆已究竟」者,無限劑大悲,於法無遺吝也

此 也。何所修?謂「念所受法」也。何故修?謂「勿令忘失」也。以何方便修?謂 中 , 云何修?謂宜 一勤而 行之」也。何處修?謂山 間 ` 空澤 樹下、 閒處 靜 室

「常當自勉,精進修之」也。

若未入真實,皆名空死。若得少爲足,後必有悔。悔何及哉

約滅惡拔苦,喻如良醫;約生善與樂,喻如善導 0 佛不負衆生,衆生多負佛耳!可

不悲夫!

二證決流通

苦, 白 滅;滅苦之道,實是真道,更無餘道。世尊!是諸比丘,於四諦中,決定 如是三唱,人無問者。所以者何?衆無疑故。時阿翁樓馱,觀察衆心 汝等若於苦等四諦有所疑者,可疾問之,毋得懷疑,不求決也。爾時世尊 .佛言:世尊 不可令樂 !.月可令熱 ;集真是因 7 ,日可令冷,佛説四諦不可令異。 更無異因;苦若滅者 ,即是 因滅 7 佛説苦諦實 因滅 故 而 果

如來 盡出世因果。故於四諦懷疑,則一切法咸皆有疑;苟於四諦無疑,則一切法皆得無 代教法 ,義理雖多, 四諦攝盡 。以苦集二諦,攝盡世間因果 滅道二 一諦 攝

無疑

疑。所以垂滅殷勤三唱,深顯除四諦外更無餘法也。文中有三門攝義,示現決定無

疑

從初至「不求決也」,是第一方便顯發門。以此四諦,乃修行者常所觀察,及依之

起行故。

從「爾時世尊」至「衆無疑故」,是第二滿足成就門。於中,「如是三唱」句,示 現法輪滿足成就;「人無問者」句,示現證法滿足成就;「衆無疑故」句,示現斷

功德滿足成就也

阿泥 從「 樓豆 回 瓷樓馱」至「決定無疑」,是第三分別說門。阿瓷樓馱,亦云阿那律,亦云 ,亦云阿難律陀,皆梵音楚夏耳 。此翻無貧 , 亦翻無滅, 亦翻 如意 0 昔於

故得此名 饑世,施辟支佛一食,獲九十一劫中往來人天,常受福樂,至今不滅,所求如意 。天眼第一,故能觀察衆心,決定分別說也。月是太陰精 ,故冷;日是太

陽精 故有得神通者,便可令月熱日冷。至於佛所說之四諦,乃是衆生心性法爾道理,理 故熱 0 然此依報器世間法 ,皆是吾人唯識所現, 即是識之相分 , 無實法

無變異 如苦諦者,三界二十五有,下自阿鼻地獄,上至非非想天,雖升沈迥異

然無不爲四相所遷、八苦所逼,安可令樂?如集諦者,見思二惑,善惡不動三有漏

安樂?如道諦者,戒定慧三,能斷苦因苦果,至無苦處,安有餘道?此四皆審實不 ,的的是牽生三界之因,豈有異因?如滅諦者,因滅則苦果隨滅 ,豈非寂靜無爲

虚 ,故名爲諦 0 佛如實說 ,比丘亦如實解 ,所以決定無疑 也

Ξ 斷 疑流通又三:初顯示餘疑,二爲斷彼彼疑,三重說有爲無常相勸

修。今初

説 於此衆中, 7 即皆得度 所作未辦者,見佛滅度,當有悲感。若有初入法者,聞佛所 ;譬如夜見電光 ,即得見道。 若所作已辦,已度苦海者 ,但

作是念:世尊滅度,一何疾哉!

此仍是阿笺樓馱分別語也。於中有三種分別:

所作未辦者, 指初果二果三果。以思惑未盡斷故,當有悲感,如阿難愁憂等是

也。

二初入法者,指內外凡。繇觀行力深,故今一聞佛法,速疾見道,如夜見電光,更

非延緩。以見道一十六心,不出一刹那故也。

三所作已辦者,指阿羅漢 0 見思斷盡 ,永超三界苦海,故無復情愛悲感;但未知佛

實不滅,故謂滅度何疾也。

二爲斷彼彼疑

滅; 以後,我諸弟子展轉行之,則是如來法身常在而不滅也。 應可度者,若天上人間,皆悉已度;其未度者,皆亦已作得度因緣。自今 固 阿翁樓馱雖説此語,衆中皆悉了達四聖諦義,世尊欲令此諸大衆皆得堅 ,以大悲心 會而 不離 7 . 7 終不可得 復爲衆説:汝等比丘 。自利利他,法皆具足, 7 勿懷悲惱。 若我住世一 若我久住 7 劫 更無 7 所 會亦當 益 0

四聖諦者 , 證此四諦 ,得成聖果,故名聖諦;又理雖固然,唯聖諦了, 故名聖諦

也。

時衆雖悉了達,而如來悲心淳至,普爲未來永斷餘疑,所以復爲衆說。是中,文亦

分三:

初從「 法皆具足」,便可依之修道。至於會必有離,自是世法應爾;且我久住,於汝無 勿懷悲惱」至「更無所益」,即斷所作未辦見滅悲感之疑。旣「自利利他

益,何用悲感爲哉?

二從「 聞說即皆得度;佛滅度後,見道無繇!」故今釋曰:所應度者,我已度訖;縱未度 應可度者」至「得度因緣」,即斷電光見道之疑。謂有疑曰:「佛住世時

者,皆已爲作得度因緣,因緣若到,勿愁不見道也。

機,故且說五分法身爲常住耳。若入實者,應化亦常。靈山一會,儼然未散,非欺 持不壞;旣法身常在不滅,則果分住持不壞。因果俱常,何云疾滅?然此仍對權 三「自今以後」至「而不滅也」,即斷滅度何疾之疑。旣弟子展轉行之,則因分住

我也。

三重說有爲無常相勸修

是故當知,世皆無常,會必有離,勿懷憂惱,世相如是。當勤精進,早求

滅之,如殺怨賊而不歡喜! 病。此是應捨罪惡之物,假名爲身,没在老病生死大海;何有智者,得除 解 脱 ,以 智慧明 ,滅諸癡暗。世實危脆,無堅牢者,我今得滅 ,如除惡

文有二意:從初至「無堅牢者」,正明無常觀門,以勸勤修。

從「我今得滅」以下,是引己作證也。佛妙色身,等眞法性 無量功德莊嚴顯現

而云是罪惡物,喻以惡病怨賊者,示同凡夫,令警省耳!三斷疑流通竟。

四囑付流通

相。汝等且止,勿得復語,時將欲過,我欲滅度。是我最後之所教誨 汝等比丘,常當一心,勤求出道,一 切世間動不動法,皆是敗壞不安之 0

故勸令精進以修之也。欲界爲動法,色無色界爲不動法,雖有動靜之殊,總屬無常 常當一心」,是囑令住於實慧。「勤求出道」,是囑令方便修習。以實慧難得 ,

無我,不可不思出離也。

勿得復語」,是勸止三業,成就寂滅無我法器。「時將欲過」,是示當歸滅

離中道以爲究竟。

嗚呼!末後殷勤,悲心極矣!爲弟子者,宜何如鏤骨銘肝也。 最後教誨」,是正顯遺訓,住持法中最勝最要

佛遺教經解

跋語

所誤 向西方。仍作迦陵頻伽,代彌陀廣宣法要可矣!甲申九月二十日記 徒以語言文字而作法施,何異諸天說法鳥耶?然一隙之明,弗忍自吝,藉此功德,回 虚度,二十餘年,空無剋獲。旣非道人,又非白衣 旭未出家時,讀此遺敎,便知字字血淚;旣獲剃染,靡敢或忘。所恨慧淺障深,悠悠 ,謬膺恭敬 。承甫敦沈居士,固請解釋此經。嗟夫!予不能臻修世出世間 。方撫心自愧,對鏡生慚。而虛名 功德

ニハ

唐太宗文皇帝施行遺教經勑

行。 隱, 行業,與經文不同,宜公私勸勉,必使遵行。(hand hand man 義 若縱情淫佚,觸塗煩惱,關涉人間,動違經律,旣失如來玄妙之旨,又虧國王受付之 法者, 。遺敎經 所須紙筆墨等,有司準給。其官宦五品已上,及諸州刺史,各付一卷。若見僧尼 微言且絕。永懷聖敎,用思弘闡,宜令所司,差書手十人,多寫經本 如來滅後,以末代澆浮,付囑國王大臣 ,是佛臨湼槃所說,誡勒弟子,甚爲詳要。末俗緇素,並不崇奉。大道將 ,護持佛法。然僧尼出家,戒行須備 ,務盡施

宋真宗皇帝刊遺教經

之增長。是以迦維之聖,出世而流慈;舍衛之區,隨機而演法。旣含靈而悉度,將順 夫道非遠人,教本無類 ,雖蠢動之形各異 ,而常樂之性斯同。由愛欲之紛綸 致輪迴

俗以歸真。猶於雙樹之間,普告大乘之衆,示五根之可戒,問四諦之所疑;期法奧之

導祕詮 宣揚,俾衆心而堅固。大悲之念,斯謂至乎!朕祇嗣慶基,顧慚涼德,常遵先訓,庶 。因覽斯經,每懷欽奉。冀流通而有益,仍俾鏤於方板。所期貽厥庶邦,凡在

群倫,勉同歸向云爾!

四十二章經解



佛說四十二章經解

明古吳蕅益釋智旭著

經題七字,通別合舉,人法雙彰。「經」之一字是通名,一切大小乘脩多羅藏,同

名經故 。「佛說四十二章」六字是別名,異衆經故

就別名中 ,「 佛 」爲能說之人,「 四十二章 」爲所說之法

「佛」者,梵語具云佛陀,此翻覺者,謂自覺、覺他、覺行圓滿。自覺不同 凡夫,

覺他不同二乘,覺滿不同菩薩。即是釋迦牟尼如來,萬德慈尊,娑婆世界之敎主

也。

說」者,悅所懷也。佛以度生爲懷,機緣未至,默然待時;機緣旣熟,應病與藥

也。

四十二章」者,約數標名。蓋從一代時教之中,摘其最切要、最簡明者,集爲一

佛說四十二章經解

册,以逗此土機宜,所以文略義廣,該通四教,未可輒判作小乘也。

後漢迦葉摩騰、竺法蘭同譯

後漢,即東漢,對前漢而言之。

道,貫日經天。太史扈多占之,謂是西方大聖人入滅之象。」 傅毅對曰:「臣聞西域有神,號之爲佛。陛下所夢,其必是乎!」博士王遵亦奏 聲教流被此土。王命刻石爲記,埋之南郊。後於周穆王時,乾坤震動,有白虹十二 光貫太微。太史蘇由卜之,得乾之九五,飛龍在天,是西方大聖人也;後一千年, 孝明皇帝永平三年,歲次庚申,帝夢金人,項有日光,飛來殿庭。以問群臣,太史 曰:「按周書異記,載佛誕於周昭王二十六年甲寅。時江河泛溢,大地皆動,五色

法 明帝乃於七年歲次甲子,勑郎中蔡愔、中郎將秦景、博士王遵等一十八人,西尋佛 至印度國 ,歲次丁卯,至洛陽。帝悅 ,請迦葉摩騰及竺法蘭,用白馬馱經,幷將舍利 ,造白馬寺,譯四十二章經 , 及畫佛像。以永平

至十四年正月一日,五岳道士褚善信等,負情不悅,表請較試。乃於十五日,大集

繞壇涕泣,啓請天尊,詞情懇切,以旃檀柴等燒經,冀經無損。並爲灰燼。先時升 [馬寺南門,信等以靈寶諸經置道東壇上,帝以經像舍利置道西七寶行殿上。信等

天 、入火 , 編 覆 大衆 、履水、隱形等術,皆不復驗。而佛舍利 ,映蔽日輪 。摩騰以神足通 ,於虛空中飛行坐臥 ,光明五色直上空中 ,神化自在 , 0 旋環如 天雨寶

華,及奏衆樂。時衆咸喜,得未曾有。此即佛法入震旦之始也。

按迦葉摩騰及竺法蘭,皆中印度人,二名俱不見有翻

所云譯者, 謂以華言易彼梵語,令此方之人得解義也

求佛進止。世尊教勑,一一開悟。合掌敬諾,而順尊勑 世尊成道已 鹿野苑中 7 轉 ,作是思惟:離欲寂靜 四諦法輪,度憍陳如等五人而證道果。復有比丘所説諸疑 ,是最爲勝 0 住大禪定 ,降諸魔道 。於 7

所 此方文字之體貴在簡略。然細繹之,六義俱備: 諸經通序 謂 :如是我聞 ,皆有六種證信:一 , 時佛在某處等 法體 0 ,二能聞,三機感,四教主,五處所 今文次第 , 與通途稍異 (。蓋繇佛法初來,且順 ,六同 聞

所 世尊」二字,即標教主。「成道已」三字,即標機感。「鹿野苑中」,即標處 憍陳如等 」 及「復有比丘」,即標能聞及餘同聞。「法輪」、「 教勑 , 即

標法體

惟」至「降諸魔道」,乃追叙成道之法。三從「於鹿野苑」至「證道果」三句,乃 就此一文, 別叙法輪之始 仍分四節 。四從「 ·初「世尊成道已」一句,乃總叙一化之繇。次從「作是思 復有比丘」至順尊勑,乃正叙此經發起也

初文,「世尊 切衆生世間 、一切正覺世間 」者,即我釋迦牟尼如來。 ,獨稱尊也 乃天中之天、聖中之聖,於一切器世間

度迦 生兜率內院 所明。今爲此土有緣衆生,故於過去人壽二萬歲時, 成道」者,若論世尊,實成佛道以來,已經不可說微塵數劫,如法華經壽量品中 維 衛國 0 ,以淨天眼 父名淨飯 , ,母名摩耶 觀可化機 。處胎 。直至人壽百歲時 十月,從左脇生 ,機緣 迦葉佛會,示居補處位中 。一手指天,一手指 方熟 ~, 迺示 降神 於中印 地 。 上

目顧四方,周行七步。自言:天上天下,惟吾獨尊。次復示爲童子,徧學衆藝,無

不超倫 。至年二十九歲,遊城四門,覩老病死及沙門相,決志出家。子夜踰城,金

久得證 刀剃髮 , 盡棄珍飾 知非究竟 ,披樹神所獻麻衣 ,捨之而去。 次從鬱頭藍子習非想非非想處定,亦不久得 ,遊學諸國。先從阿藍迦藍習無所有處定 證 , 不 0 知

非究竟 釋化 將欲度之,遂往雪山,示修六年苦行。每日止食一麻一麥,皮骨連立,終不成道 現童 , 捨之而去 子所施吉祥 。受牧女十六轉乳糜之供,精氣充足。次往熙連河中, 0 見諸外道,競修苦行 草, 指摩竭提國金剛場菩提樹下 ,希冀得道,各以三年爲期 敷草結跏趺坐 浴身而 , 終無剋 出 以 取取 慈心三 天帝 獲 0

漏道 ,是爲佛寶初現世間也 昧

,降伏

魔軍

, 深

入四禪

,觀察四諦

0

於臘月初八夜,明星出時

,

豁然大悟

,證無

5

0

勝 四禪中,頓發三明,破魔王之愛網,斷外道之見縛也。或初成道句,是根本智,自 次文,「作是思惟」等者,乃追叙坐樹下時,以無師智、自然智,了知離欲寂靜爲 0 故 先訶棄欲界惡不善法 ;次又離喜 而 證妙樂 ,入於三禪 , 與覺觀俱 ;次又雙棄苦樂 , 而 入初禪 ;次復離於覺觀 ,捨念清淨 , , 入第 內淨 四 .禪 心 0 從 而

證菩提。次「作是思惟」等,是後得智,重觀四諦以爲說法之本。寂靜最勝,即觀

滅諦;住大禪定,即觀道諦;諸魔外道,即苦集二諦也

第三文中,「鹿野苑」者,亦名鹿園,在波羅奈國,即佛初轉法輪之處。

「轉四諦法輪」者:苦集滅道名四諦。

苦是世間之果,即指三界六道色心五蘊。

集是世間之因 ,即指見思煩惱,及有漏善惡不動等業 0

滅是出世之果,謂因滅故果滅,便得寂靜無爲安樂

道是出世之因,謂略則戒定慧,廣則三十七品,所謂四念處、四正勤、四如意足

五根、五力、七覺支、八正道也。

此四皆名「諦」者,審實不虛故。復名「四聖諦」者,惟有聖智乃證知故

佛既證見此四諦理,轉令一 切衆生咸使聞知。從佛後得智中,流出法音,度入衆生

說此四諦法輪,凡有三轉: 心中,故名爲輪。又輪者,摧碾之義。以此教法,轉破衆生見思諸惑,故名爲輪

者,示轉。謂此是苦,逼迫性;此是集,招感性;此是滅,可證性;此是道,可

修性。

者 , 勸 轉 。謂此是苦,汝應知;此是集,汝應斷;此是滅 ,汝應證;此是道 , 汝

應修。

三者 證轉 。謂此是苦,我已知;此是集,我已斷;此是滅,我已證;此是道,我

已修。

是爲法寶初現世間也。

之。初轉法輪,陳如先悟。次說布施持戒生天之法,訶欲不淨,讚歎出離爲樂 敢歸 母舅 男。此三人皆佛父黨。四憍陳如 **憍陳如等五人者:一** 人樂苦行者亦復捨去,於鹿苑中各修異道。佛旣成道,觀此五人應先得度,遂往就 或 。初太子踰城出家,父王思念不置,命此五人尋之。太子旣誓不肯歸 遂相侍從。太子旣修苦行,二人不堪苦行者先自遁去;太子後受美食 阿濕婆,此翻馬勝。二跋提,此翻小賢。三拘利,或名摩訶 ,此翻火器。五十力迦葉,或名婆敷。此二人皆佛 , 五 河 人不

濕跋提尋悟。第三說法,迦葉拘利亦悟。是爲僧寶初現世間也。

葉等一千人,舍利弗 第四文中,「 復有比丘」等者:佛旣度此五比丘已,次復度耶舍等五十五人,三迦 、目犍連等二百人。從是以後 ,度人無量,咸令成比丘性

言「比丘」者, 果上之饑饉也。又含三義:一破惡,二乞士,三怖魔 此翻除饉 。謂其具持二百五十淨戒,堪爲人世福田,除彼衆生因中

0

所說諸疑 ,求佛進止」,猶言決擇可否也。「合掌」表於一心聽法,不惰不散

已上序分,下皆正說

七生, 陀含 動天地。 止清淨,爲四真道行 佛言:辭親 0 便證阿羅漢 斯陀含者 次爲阿那含。阿那含者,壽終靈神上十九天,證阿羅漢 出家 ,識心達本 , 上 一 0 愛欲斷者 ,成阿羅漢 還 ,即得阿羅漢 ,解無爲法,名曰沙門。常行二百五 7 如四肢斷,不復用之。 。阿羅漢者,能飛行變化,曠劫壽命,住 0 次爲須陀洹 。須陀洹者 十戒 。次爲斯 ,七死 進

此第一章,總明沙門果證之差別也。

欲證沙門四果,必須「辭親出家,識心達本,解無爲法

蓋父母不許,則佛法中不聽出家。出家而不識心達本,則身雖離俗,仍縛有爲,不

得名爲沙門。

他如幻

識心 」者,了知心外無法,即悟徧計本空。「達本 」者,了知心性無實,即悟依

解無爲法」者,了知真如與一切法不一不異,即證圓成實性

梵語「 即增上戒學。 沙門」,此翻勤息 ___ 進止清淨 」,即增上心學 ,謂勤修戒定慧,息滅貪瞋癡也。「常行二百五十戒」, 。「爲四眞道行」 , 即增上慧學 ; 謂

四諦而修道行也。

身 |三界見思二惑。「 飛行變化 」,聊舉六神通之一事 阿羅漢」,具含三義:一殺賊,二應供,三不生。乃沙門所證第四無學之果,斷 堪能隨願久住 0 住動天地」,言羅漢所住之處,天神地祇皆爲感動 。「曠劫壽命」,謂 ;或可一 三種意生

佛説四十二章經解

一住,皆能震動天地也。

十,則超過下十九天。繇彼已斷欲界九品思惑,即於五淨居天中證阿羅漢,不復還 阿那含 」,此云不還,即第三果。「十九天」者,從四王天,上至無煩,爲第二

斯陀含」 ,此云一來,即第二果。已斷欲界六品思惑,餘三品在。故一上欲天

一還人中,即證阿羅漢也。

來欲界也

惑 品感 欲界九品思惑全在,故能更潤七生。謂欲界上上品任運貪瞋癡慢,能潤二生;上中 須陀洹」,此云預流,即是初果。已斷三界見惑,初預聖流,不復墮三惡道。但 共潤一生;下上品、下中品、下下品惑,共潤一生。七番生死之後,方證阿羅 ,能潤一生;上下品惑,亦潤一生;中上品惑,亦潤一生;中中品、中下品

然三界見思,雖有多品多類,總以愛欲爲本。愛欲一斷,便出苦輪。故喩如四肢一

漢果。此約任運斷者;若加行斷,則復不定

佛言:出家沙門者,斷欲去愛,識自心源,達佛深理,悟無爲法。內無所 斷 決不復用也

得 7 外無所求。心不繫道,亦不結業 。無念無作, 非修非證。不歷諸位 7

而自崇最。名之爲道。

此第二章,明沙門果證雖有差別,而所證之理無差別也。

斷凡聖同居欲愛,識自心源我執本空,達佛真諦深理 ,悟生空所顯眞如無爲之法

斷方便有餘欲愛,識自心源法執本空, 達佛俗諦深理 ,悟法空所顯真如無爲之法

斷實報無障礙欲愛 ,識自心源俱空不生,達佛中諦深理,悟俱空所顯眞如無爲之

法。

又了知三土欲愛即空,名斷欲去愛,識自心源徧計本虛,達佛眞諦深理,一 空一切

空, 無假無中而不空,悟如來藏如實空義 ,名無爲法 0

了知三土欲愛即假 , 名斷欲去愛,識自心源依他如幻 , 達佛俗諦深理 假 切

假 。無空無中而不假,悟如來藏如實不空義,名無爲法

了知三土欲愛即中, 名斷欲去愛,識自心源圓成本具 ,達佛中諦深理,一中一切

中 無空無假而不中 ,悟如來藏離即離非、是即非即義 ,名無爲法

此無爲法,本自有之,非屬新生,故「內無所得」。惟一眞心,心外無法,故「外

無所求」。

知法如筏,故「心不繫道」。已斷惑種,故「亦不結業」。

證無分別根本實智,故「無念」。證不思議後得權智,故「 無作 •

稱性之修 ,修即無修,故「非修」。全性作證 ,證無別證 , 故「非證

諸位如丈尺顯虛空,而虛空元非丈尺;又如入海雖辨淺深 , 而淺深無非大海

「不歷諸位,而自崇最,名之爲道」也。

別教則中道隨緣不變,故中道不歷諸位。圓教則一色一香無非中道,故中道不歷諸 藏教則因滅會眞 ,滅非眞諦,故眞諦不歷諸位。通敎即事全眞,故眞諦不歷諸位

位。

繇上一章,方知性不廢修;繇今一章,方知修不礙性。

繇上一章,方知即而常六;繇今一章,方知六而常即

四教皆論性修,皆論六即。通此旨者,則於一代時教,思過半矣!

佛言:剃除鬚髮而爲沙門,受道法者,去世資財,乞求取足。日中 7

樹下一宿,慎勿再矣!使人愚蔽者,愛與欲也。

此第三章,讚歎頭陀勝行,以爲證道要術也。

上文旣云非修非證,恐人錯會,執性廢修,故今特申抖擻塵勞之行,以爲斷欲去愛

之方。譬如古鏡,雖復本具光明,理須磨拭 方得瑩淨耳!

佛言:衆生以十事爲善,亦以十事爲惡。何等爲十?身三、口四、意三。

身三者,殺盜婬。口四者,兩舌、惡口、妄言、綺語。意三者,嫉恚癡。 如是十事,不順聖道,名十惡行 。是惡若止,名十善行耳。

此第四章 ,明善惡無性 ,猶如反掌;而生死湼槃,惟此三業,更非他物也。

斷他物命,名之爲殺。不與而取,名之爲盜。兩相交會,名之爲婬

鬬亂彼此 ,名爲兩舌。呪咀罵詈,名爲惡口。心口相違,名爲妄言。 無義浮辭

爲綺語。

慳鄙貪欲 ,不耐他榮,名之爲嫉。暴戾殘忍,懷恨結怒,名之爲恚。於諸事理盲無

因,俗諦善爲菩薩因,中諦善爲佛乘因。此三理善,俱名上上品十善。以行事善 善爲脩 即便成水也。 果 所曉,名之爲癡。身口七支,惟是業道;意地三支,屬煩惱道。繇惑造業, ,長繫三界,故「不順聖道」。是惡若止,即名十善。譬如破闇即是光明 羅因 然惡旣有事惡理惡, 中品十善爲人道因 ,上品十善爲天道因 故翻惡爲善,亦有事善理善。 0 就理善中 就事 ,真諦善爲 善中,下品十 必招苦 ,泮冰 二乘

廣 佛言:人有衆過,而不自悔、頓息其心,罪來赴身;如水歸海 0 若人有過 7 自解知非,改惡行善 ,罪自消滅;如病得汗, 漸有痊損 7 漸 成深

者,未必能達理善;而行理善者,必兼圓滿事善故也

此第五章,承上止惡行善之意,而勸勉改過遷善也。

耳

有過 不悔 ,則如水赴海 ,日深日廣 ;知過必改, 則如病發汗 客邪自除

佛言: 惡人聞善, 故來擾亂者, 汝自禁息 ,當無瞋責 ,彼來惡者而自惡

之。

此第六章,申明善能勝惡,而惡不能破善也。

瞋責惡人。以惡乃在彼,於我無涉故也。如明鏡中現於醜容,彼容自醜,鏡何醜 上文勸人止惡行善,改過遷善,恐有愚者,畏彼惡人撓亂,遂不敢行,故誡以愼勿

哉?倘一生瞋責,則反攬彼之惡,成我之惡矣!

納,子自持禍歸子身矣!猶響應聲,影之隨形,終無免離,慎勿爲惡。 以禮從人,其人不納,禮歸子乎?對曰:歸矣!佛言:今子罵我 佛言:有人聞吾守道,行大仁慈,故致罵佛。佛默不對。罵止,問曰:子 ,我今不

此第七章,即上章「彼來惡者而自惡之」之明證也。

今人聞罵,鮮不發瞋,大似領謝帖子,正中罵者之計耳!思之思之。

患。今誡以愼勿爲惡,即是除其禍源。慈悲甚矣! 或問:佛旣大慈,何不令罵者無禍耶?答曰:佛豈欲令其得禍,無奈彼人自招禍

至彼,還坌己身。賢不可毀,禍必滅己。 佛言:惡人害賢者,猶仰天而唾,唾不至天,還從己墮;逆風揚塵,塵不

此第八章,深誡惡人令勿害賢,而兼以勖賢人也。

人若果賢,則如天亦如上風,豈受唾塵。倘可受毀,便非賢矣!

佛言:博聞愛道,道必難會;守志奉道,其道甚大

此第九章,誡勸稟敎行人,須聞而思,思而修,不宜但貴口耳之學也。

博聞者,不如隨文入觀,惟圖強記名言也。愛道者,不知道本即心,妄於心外取道

也。

如一炬之火,數千百人各以炬來分取,熟食除冥,此炬如故;福亦如之。 佛言:覩人施道,助之歡喜,得福甚大。沙門問曰:此福盡乎?佛言:譬 守志者,念念趨向菩提,不雜名利心也。奉道者,念念體會心源,不復向外覓也

此第十章,明隨喜功德,自他兼利,福無窮盡也。

施 施道有三:一資生施,謂以財濟其貧窮 ,謂以三學令得四益。不惟自行三種施道,得福甚多,即使見他行施,助令歡 。二無畏施,謂於難中拔其憂苦。 三者法

喜

,福亦無盡

供佛。 曉之。 人,與少不若與衆,世出世道,無不皆然也。「熟食」,喩成聖果。「除冥」,喩 沙門」下,釋疑。恐有愚人正行施時,見他隨喜 以問 蓋不惟無減 彌勒 ,彌勒曰:自供者成辟支佛果,施人者成無上菩提 於我 ,而福報展轉殊勝矣!昔有二人採花 ,懼他分我功德,故以炬火如故 , 自供佛 。蓋獨樂不若與 , 轉 施

破

三障

不如 者萬 佛言 含,不如飯一阿那含;飯一億阿那含,不如飯一阿羅漢;飯十億阿羅漢 飯 :飯惡人百 7 不 辟支佛;飯百億辟支佛 如飯一須陀洹;飯百萬須陀洹,不如飯一斯陀含;飯千萬 ,不如飯一善人;飯善人干,不如飯一持五戒者 ,不如飯一三世諸佛;飯千億三世諸佛 ;飯五戒 斯陀 7

不如飯一無念無住無修無證之者。

此第十一章,

較量福田勝劣不等,令人知所歸向

也

醫之法,不以三歸爲體 善勝百惡人,顯易可知。一持五戒人勝千善人者;以世間善人所奉十善,僅屬舊 ,不成出世津梁;若能受三自歸,奉持五戒,爲佛弟子 ; 便

知四諦四念處門,於一生中堪證三果,故得千倍勝於常流也。

須陀洹勝萬五戒者:須陀洹已斷見惑,已預聖流,故得遠勝內外凡也。

斯陀含勝百萬須陀洹者:斯陀含已斷欲界六品思惑,煩惱漸薄,正使百萬住果須

陀洹,未修勝進行時,終不能知二果境界,何況能到耶!

阿那含勝千萬斯陀含者:阿那含已斷欲界思惑,九品皆盡,正使千萬斯陀含,終

不能知三果境界,況能到耶!

阿羅漢勝一億阿那含者:萬萬曰億。阿羅漢斷盡見思,超出三界,尤非住三果人

能知能到故也。

世,觀物幻化,自悟無生,斷結侵習,名爲獨覺。以阿羅漢但斷正使,辟支佛兼侵 辟支佛有二種 : 者出有佛世,稟十二因緣敎,悟道侵習,名爲緣覺。二者出無佛

餘習,故一辟支,能勝十億阿羅漢也。

量衆生,故一佛能勝百億辟支佛也。 三世諸佛 , 約藏頭佛果言之。三大阿僧祇劫修行六度,正習皆悉斷盡,利益無

觸 難 佛言:人有二十難。 本無住 餓狗 妙理 成佛時 復次,前之八番,皆是約田;此第九番,即是約心。蓋未達一切諸法念本無念、住 事無心難 是謂常同常別,常別常同,法界法爾,微妙法門。 福勝劣差別,則無以顯修德之足貴;若不達生佛本自平等,則無以悟性德之淵源 分證法身 ,生值 佛 説 , 29 則下自惡人、上至諸佛,罔非無念無住無修無證之者。所以人上佛飯 功德無異 、修本無修、證本無證,故於平等法中分勝分劣;若了達無念無住無修無證 , 十二章經解 佛世難 能於色究竟天示現最高大身,統王三千世界 ,皆能示現百界作佛 ;維摩以一 ,忍色忍欲難 貧窮布施難 分奉難勝如來 、八相成道 ,所以供此 ,

分施一最下乞人,福亦平等

若不.

知

,

佛

施

通教體色入空,知一切法無性,故念即無念、住即無住、修即無修

0

別歡喜地

,圓

一發心

住,

皆已

、證即

無證

至

一人,勝於千億三世諸佛也

無念無住無修無證之者」,指圓敎初住已上,亦可兼攝別敎初地、通敎佛地。蓋

,廣學博究難,除滅我慢難,不輕未學難,心行平等難,不説 ,見好不求難 ,豪貴學道難 7 被 ,棄命必死難 辱不瞋難 7 有 7 勢不 得覩佛經 臨 難 ,

是非難, 會善知識難,見性學道難,隨化度人難,覩境不動難,善解方便

難。

此第十二章,略舉二十難事以爲勸誡也。

順情則易 ,逆情則難。然能深發肯心,則雖難而易;其或但隨流俗,則雖易亦難 0

夫貧窮則布施爲難,故雖少許之施,得福甚多,不可不勉力也。然現見有貧而能施

者,乃富人反不肯施,則慳鄙爲何如耶?豪貴學道,例施可知

人所最重者身命 誠能棄命 ,則何事不可爲者?然未聞保命畏死之人,果能長生不

死,則亦何事貪惜耶?

佛經難觀,今幸觀佛經而不研精殫思,則與不觀何異?

佛世難値 今幸值佛世而不及時進修 則與不值何殊?

色欲雖恆情所好 , 然或察其味少苦多, 或觀其如幻如影 則亦何難忍制

?

若見好時, 知其未必可求,則貪心自息;若被辱時 , 但以情恕理遣 ,則瞋意自平

視富貴若草頭露,何容以勢臨人?觀事境同夢所緣,何必勞心措置?

廣學而不博究,如入海無指南針,安能會理?恃學而生我慢,如沃壤以滋稊稗,反

害良禾。

佛嘗言四 .種不可忽:一者火雖小不可忽,二者龍雖小不可忽,三者王子雖小

忽, 四者沙門雖小不可忽。今有輕未學者 ,未知其不可忽故也

心平等 ,則施難勝如來與施最下乞人功德無異;泯是非,則一切諸法無非佛法

道 是非情見未忘,決不能見法界真善知識。不見現前一念心之實性,決不可以學無上

不學稱性權實之道 ,不能隨化度人。未達隨化度人方便 ,安能覩十法界境而一心不

動?

若不能於一一法界中具見一切法界事理,何繇善解同體方便? 故知此二十 事 ,後後難於前前也

道。 沙 門問佛 譬如磨鏡,垢去明存;斷欲無求,當得宿命。 以 何因緣 7 得 知宿命 7 會其至道?佛言:淨心守志,可會至

佛説四十二章經解

此第十三章,問意重在宿命,答意重在會道。

蓋知宿命者,未必會至道;而會至道者,決能知宿命也。

沙門問佛:何者爲善?何者最大?佛言:行道守真者善,志與道合者大。

此第十四章,明善莫善於眞修,大莫大於實證也。

,則萬善同會。志與道合,則法界體圓

行道守眞

逮於今日;十方所有,無有不見,無有不知,無有不聞。得一切智,可謂 健。忍者無惡,必爲人尊。心垢滅盡,淨無瑕穢,是爲最明。未有天地, 沙門問佛:何者多力?何者最明?佛言:忍辱多力,不懷惡故,兼 加安

此第十五章,明忍辱力大,滅垢明遠也。

明矣!

忍有三種:一耐怨害忍,亦名生忍。二安受苦忍,亦名法忍。三諦察法忍,亦名第

一義忍。今即約耐怨害而入第一義也。餘文易知。

佛言:人懷愛欲,不見道者,譬如澄水,致手攪之,衆人共臨,無有覩其

影者 。人以愛欲交錯,心中濁興,故不見道。汝等沙門,當捨愛欲。愛欲

垢盡,道可見矣!

此第十六章,明吾人心水本澄,即是至道;但繇愛欲所攪,故不能於一念中炳現十

捨三界愛欲 ,見思垢盡,則真諦道可見。捨偏真愛欲,塵沙垢盡,則俗諦道可見

界影像也。

捨果報愛欲,無明垢盡,則中諦道可見矣!

佛言:夫見道者,譬如持炬,入冥室中,其冥即滅,而明獨存;學道見

諦,無明即滅,而明常存矣!

此第十七章,深顯無明無性,故見道即可永滅;亦顯無明未滅,不得名眞見道也 知無明之可滅,不致生於退屈。知真見之常明,亦可袪增上慢矣

佛言:吾法念無念念、行無行行、言無言言、修無修修,會者近爾,迷者

遠乎!言語道斷,非物所拘,差之毫釐,失之須臾 0

此第十八章,明念行言修,皆超有無兩關,而不可以有無情見湊泊也。

念即無念,故常念此無念之念,豈以不念爲無念哉!「 行 」等三句,例此可知 0

會得則觸事全真,迷者則轉趨轉遠。

言語相即解脫相,故言語道斷。一切物即真如性,故非物所拘

才涉有無 ,便隔霄壤,故差之毫釐。才涉思惟,便成剩法 ,故失之須臾

佛言:觀天地,念非常。觀世界,念非常。觀靈覺,即菩提。如是知識

得道疾矣!

此第十九章,明唯心識觀,遣虛存實也。

常,豈是心外實法?次觀一身之中,世爲遷流 天覆地載 ,凡情計爲常住實有。今觀天則寒暑代謝,地則陵谷遞遷,旣爾生滅非 界爲方位,世固念念不停,界亦互

對無定,於中豈有實我實法?此則遣徧計之本虛也。

遣虚 次觀現前一念靈覺之性,即離我法二執,便成四智菩提,此則存依圓之實性也。 則無增益謗 , 存實則無損減謗 非有非無,速契中道矣!

佛言:當念身中四大,各自有名,都無我者。我既都無,其如幻耳--

此第二十章,示人以四大觀身,而入如幻法門也

身中堅者名地,潤者名水,煖者名火,動者名風,覓我了不可得 0

能成所成,體皆如幻;能觀所觀,亦復如幻。於一幻喻,便可通達空假中

故知四大觀身,實四教之總户也。

理

枉功勞形。譬如燒香,雖人聞香,香之燼矣!危身之火,而在其後 佛言:人隨情欲,求於聲名;聲名顯著,身已故矣!貪世常名而不學道,

此第二十一章,甚明好名之人,不惟無益,而且深有損也。

佛言:財色於人,人之不捨。譬如刀刃有密,不足一餐之美;小兒舐之

則有割舌之患。

此第二十二章,甚明財色之味寡而傷害甚多,有智者不可類彼小兒也。

情愛於色,豈憚驅馳!雖有虎口之患,心存甘伏,投泥自溺,故曰凡夫。 佛言:人繫於妻子舍宅,甚於牢獄。牢獄有散釋之期,妻子無遠離之念

透得此門,出塵羅漢。

此第二十三章,深明妻子舍宅之埋沒人,而勸以速遠離也。

欲界以男女眷屬爲妻子,種種宮殿爲舍宅。色界以味禪爲妻子,四禪天爲舍宅。無

色界以癡定爲妻子,四空天爲舍宅。愛見所噬,患同虎口

充類言之,二乘以一解脫味爲妻子,偏眞湼槃爲舍宅。權敎以遊戲神通爲妻子 ; 出

佛言:愛欲莫甚於色。色之爲欲,其大無外,賴有一矣。若使二同,普天 真涉俗爲舍宅。透得空有兩門,方成中道無生之果

之人,無能爲道者矣。

此第二十四章,深明色欲爲衆生重病也。佛頂經云:婬心不除,塵不可出。

佛言:愛欲之人,猶如執炬逆風而行,必有燒手之患。 此第二十五章,甚明愛欲之不可習近也。

逆風把炬,未有不燒手者;習近愛欲,安得不損淨法身、害方便手耶?

天神獻玉女於佛,欲壞佛意。佛言:革囊衆穢,爾來何爲?去!吾不用。

天神愈敬,因問道意。佛爲解説,即得須陀洹果

此第二十六章,明佛不被魔嬈,遂能化魔也

天神即魔王波旬 , 佛初成道時 ,先興甲兵,不能害佛,次獻三女,又不能嬈佛

歸佛化而證初果。

人能觀彼女人爲革囊衆穢,則婬意得除,自他俱利矣

佛言:夫爲道者,猶木在水,尋流而行。不觸兩岸 ,不爲人取,不爲鬼神

欲所惑,不爲衆邪所嬈,精進無爲,吾保此人必得道矣 0

所遮,不爲洄流所住,亦不腐敗

,吾保此木決定入海。學道之人,不爲情

此第二十七章,喻明學道須遠離諸障也。

兩岸以喩情欲 9-則有見思情欲、無明情欲 。見思情欲耽染生死 , 如觸此岸 ;無明情

欲耽染涅槃,如觸彼岸。

人及鬼神,以喻衆邪。愛網所纏,如爲人取;見網所覆,如爲鬼神所遮。

洄流所住,正與精進相反;腐敗,正與無爲相反。蓋不能直心正念真如,每欲進而

反退,如流急反洄;不達無爲法性,則著相所修福慧,終成腐敗。

故必不爲生死湼槃情欲所惑,不爲愛見衆邪所嬈,正念眞如而精進,了達法性本無

爲,斯得道可保矣!

佛言:慎勿信汝意,汝意不可信。慎勿與色會,色會即禍生。得阿羅漢

已,乃可信汝意。

此第二十八章,深誡意馬難調,而色禍宜避也。

衆生無始以來,祇因恣情率意,久受輪回。未證阿羅漢,常與無明愛見慢俱,豈可

自信汝意而不事推簡耶?

濁世, 佛言:慎勿視女色,亦莫共言語。若與語者,正心思念:我爲沙門,處於 當如蓮華 ,不爲泥汙。想其老者如母,長者如姊,少者如妹 7 稚者

如子。仝度脱心,息滅惡念。

此第二十九章,申明遠女防過生善滅惡之方便也。

先以蓮華不染而自期待,則正念自利。復視如母如姊如妹如子而度脫之,則慈心利

他。

既與二利相應,惡念自然息滅。

佛言:夫爲道者, 如被乾草, 火來須避。道人見欲,必當遠之。

此第三十章,申誡遠離諸欲,勿令爲欲火所燒害也。

六情根獨如乾草,六塵境喩若烈火,未到心境兩空,應修遠離勝行。

意,意以思想生,二心各寂靜 功曹,功曹若止,從者都息。邪心不止,斷陰何益?佛爲説偈 ,非色亦非行。佛言:此偈是迦葉佛説 :欲生於汝

佛言:有人患婬不止,欲自斷陰。佛謂之曰:若斷其陰,不如斷心。心如

此第三十一章,申明斷欲須從心斷也。

耶?無因生耶?又此思想,爲在內耶?在外耶?在兩中間耶?爲在過去耶?現在 斷心之法:推此欲從意生,意復從思想生。只此思想,爲自生耶?他生耶?共生

耶?未來耶?

如是推時,思想寂靜。思想寂靜故,意即寂靜。意寂靜故,欲即寂靜。欲寂靜故

佛説四十二章經解

七0

觀一切色如鏡像等,即是非色;觀一切行如泡沫等,即是非行

從上諸佛展轉傳受,不過傳此調心方便而已。

佛言:人從愛欲生憂,從憂生怖。若離於愛,何憂何怖?

此第三十二章,推憂怖之繇愛欲,而勸人斷欲去愛也。

衆生無始以來,妄認四大爲自身相,妄認六塵緣影爲自心相,執著貪戀不肯暫捨 、種種恐怖。惟以四大觀身,知身無我;以四運觀心,知心無常。愛

欲旣斷,憂怖自除 0

遂生種種憂惱

退,或格鬭而死,或得勝而還。沙門學道,應當堅持其心,精進勇鋭,不 佛言:夫爲道者,譬如一人與萬人戰。挂鎧出門,意或怯弱,或半路而

畏前境 ,破滅衆魔,而得道果。

此第三十三章,喻明爲道之人,須具戒定慧也

專精學道之心,譬如一人。無始虛妄諸惑習氣,譬如萬人。

受持淨戒,譬如挂鎧。惟堅持其心,則無怯弱之意,此戒力也。精進勇銳,則無半

路之退,此定力也。

不畏前境 則無格鬬致死,此慧力也。合此三力,破滅無始衆魔而證道果,是爲得

勝而還矣。

惱,行即退矣。其行既退,罪必加矣。但清淨安樂,道不失矣 若調適,道可得矣。於道若暴,暴即身疲。其身若疲,意即生惱 爲何業?對曰:愛彈琴。佛言:弦緩如何?對曰:不鳴矣!弦急如何?對 沙門夜誦迦葉佛遺教經,其聲悲緊,思悔欲退。佛問之曰:汝昔在家,曾 日·聲絶矣!急緩得中如何?對日·諸音普矣!佛言:沙門學道亦然 0 。意若生 心心

此第三十四章,明學道之法,須善調身心,勿令緩急失所也。

儒者亦云:其進銳者其退速。又云:勿忘勿助。蓋三乘出要類 如此

佛言:如人鍛鐵,去滓成器,器即精好。學道之人,去心垢染,行即清淨

矣。

此第三十五章,喻明垢染不可不除也。

佛説四十二章經解

但除 **垢染**,即成清淨 。所謂但盡凡情,別無聖解;但有去翳法 ,別無與明法也

成佛作祖,豈於心外有法可得哉?不過淨除習氣而已。

佛言:人離惡道,得爲人難。既得爲人,去女即男難。既得爲男,六根完

具難 難 0 既得遇道 0 六根既具 ,興信心難。既興信心,發菩提心難。 7 生中 ·國難。既生中國,值佛世難 。既值佛世, 既發菩提心 7 無修無 遇道者

證難。

此第三十六章,展轉明難得之事以深警人,令勿失良緣也。

不達無修無證 ,豈名真正發菩提心?不發真正菩提,豈名信心?不興信心,豈名遇

道?

旣不遇道,值佛何益?旣值猶不值,則中國猶之邊方。旣中國不異邊方,則六根具

猶不具。

根具猶不具 ,則男子亦非男子。旣男子不成男子 ,則人身何異惡道

靜言思之,可不發菩提心,急悟無修無證之要旨乎?

:佛子離吾數千里,憶念吾戒,必得道果。在吾左右,雖常見吾,不

順吾戒,終不得道。

此第三十七章,深明心近則近,心遠則遠,而不以形跡論遠近也。金口誠言,重戒 若此,末世弟子,奈何弗思!

常見彼,彼常近我。」 比丘已先見我。若比丘放逸懈怠,不攝諸根,雖共我一處,彼離我遠,彼雖見我 從何來?爲有伴否?」彼即以上事答。佛言:「癡人!汝不見我,謂得見我。彼死 佛。」答言:「我寧喪身,不毀佛戒。」遂便渴死。即生忉利天上,天身具足。是 言:「世尊制戒,不得飲蟲水故。」彼復勸言:「長老但飲,勿令渴死,不得見 井 我不見彼;若有比丘,於海彼岸,能不放逸,精進不懈,斂攝諸根,雖去我遠,我 夜先到佛所,禮足聞法,得法眼淨。飲水比丘,後日乃到佛所。佛知而故問:「 汝 僧祇律云:波羅脂國有二比丘, 比丘汲水便飲;一比丘看水見蟲,不飲。飲水比丘問言:「汝何不飲?」答 共伴來詣舍衛問訊世尊。中路渴乏無水。前到

人命在幾間?對曰:飯食間。佛言:子未知道。復問一沙門:人命在幾 佛問沙門:人命在幾間?對曰:數日間。佛言:子未知道。復問 一沙門:

間?對曰:呼吸間。佛言:善哉,子知道矣!

祖白王曰:「彼惟惜此一身之死,遂於色聲無所見聞,何況沙門秉佛無常無我至 隨後 宮女音樂,徧處歌舞,試問罪人何所見聞。」王如其言。令一罪人手捧滿油,徧歷 惱耶?」祖師曰:「 王試取一獄中必死罪人,滿器盛油,令其手捧,用四屠人出刃 問祖師曰:「吾見外道種種苦行,尙不能折伏婬心,而今沙門四事如意,豈能斷煩 保,況刹那刹那念念生滅,非沈思諦觀,豈能知之!昔西域有一國王,不信佛法 此第三十八章,明人命無常,不可不知也。 四衢女樂叢中。一滴不墮,因赦其罪。召而問之:「汝於四衢何所見聞?」罪人答 期色心連持不斷,名爲命根,乃依本識種子假立,非有實法。出息雖存,入息難 。若能一滴不失,便赦其罪;若傾一滴,隨手斬之。同彼遊於四衢。王更盡出 我於爾時 ,唯恐一滴油墮 , 白刃加頸 。故惟見手中之油,更無他見聞也 ,

敎 ,痛念無量劫數生死之苦,安得不斷煩惱!彼外道等,不知無常無我,徒事苦

行,故無益耳。」王乃信服。

噫!誠知人命在呼吸間,何俟屠人執刀隨後,而心始無放逸哉!

佛言 學佛道者,佛所言説,皆應信順。譬如食蜜 ,中邊皆甜;吾經亦

爾。

此第三十九章,明佛經皆應信順,不應妄分大小頓漸,而生輕重心也。

佛之言教,不出權實,爲實施權 ,開權顯實。四教各有四門,門門各具四悉。今有

執小謗大,執大謗小,執事撥理 ,執理撥事者,皆違佛旨者也

佛言:沙門行道,無如磨牛;身雖行道,心道不行。心道若行,何用行

道。

此第四十章,明行道在心不在形也。心不入道,徒事外儀,與磨牛何異哉!

乃可蘇息。沙門當觀情欲,甚於淤泥。直心念道,可免苦矣 佛言:夫爲道者,如牛負重。行深泥中,疲極不敢左右顧視;出離淤泥

七六

此第四十一章,誡人直心念道,當以出離情欲爲期也。

樂, 聚 敝帛。視大千界,如一訶子。視阿耨池水,如塗足油。視方便門 佛言:吾視王侯之位,如過隙塵。視金玉之寶,如瓦礫。視紈素之服,如 0 如畫夕寤。視倒正,如六龍舞。視平等,如一真地。視興化 視 無上乘 ,如夢金帛。視佛道 ,如眼前華。視禪定 7 如須彌柱 ,如四時 ,如化寶 0 視湼

木。

此第四十二章,結明佛眼等觀一切諸法,所以破衆生之法執也。

人間一百年 ,不過忉利天一晝夜;娑婆一大劫,不過極樂世界一晝夜。則王侯榮

貴,與過隙塵何異?

諸天器皿,純是七寶;極樂國地,黃金所成。彌勒成佛道時,此地亦皆瑠璃,況金

玉瓦礫等是四微所成,何足重哉?

服雖紈素不過蔽形,苟可遮羞,敝帛何害?

大千界亦是惟心,一訶子亦是惟心。觀相元妄,故於是中橫計大小。觀性元眞,變

大千之心非大非多,變訶子之心非小非少也。

阿耨池水與塗足油,例此可知。

方便門」者,諸佛所設三乘五乘七九諸方便也。衆生稟此法寶,剋果不虛。 然在

諸佛,不過爲實施權,豈有實法?故但如化寶聚耳 !

無上乘 雖 云是最實事 ,然皆衆生性具之理,心外無法,故曰:圓滿菩提 ,歸

無所

得。如夢中金帛,豈有實物可得哉?

種種 ·佛道,爲對凡情;凡情不生,佛道何有?所謂「無爲無起滅,不實如空華 」

也。

須彌 出海 , 風浪不能漂動;禪定持心,境識不能遷惑 0 然須彌無實法,不過四寶四

微合成;禪定亦無實法,不過諸心心所四分合成耳 1

生死 如長夜,無明所纏,故晝夕咸寐;湼槃如永日 ,智慧開朗,故畫夕咸寤也。

流轉 覺名爲正,而實無增。故但如六龍舞,不過首尾相換而已 生死 ,惟是六根;安樂湼槃,亦惟六根 。背覺合塵名爲倒 ,而實無減 ;背塵合

佛説四十二章經解

相法門,直是頭頭法法,無非大總相法門也 諸法旣皆平等,則隨舉一微塵法,即與一真如地平等。非離一切法外,別有一大總

榮 依一真地而施化道,如依大地而有四時之木 ,番番實,番番落。終而復始,始而復終,徧於十方,亘於三世,皆是如來自在 。春生夏榮,秋實冬落,番番生,番番

佛説四十二章經解

神力也

佛滅度 者。」 加也。諸供養中,法供養最。法供養者,識自本心,了法空寂,念念佛出世,念念 摩不二之門,不越乎此矣!又言「飯千億三世諸佛,不如飯 結業,無念無作,非修非證,不歷諸位而自崇最,名之曰道。」金剛無住之旨,維 是經頓漸兼收。首唱「識心達本,解無爲法,名曰沙門。」又言「心不繫道,亦不 夫無念無住無修無證之者,所謂自性天眞佛也。三世諸佛覺此而已 ,是爲飯一無念無住無修無證之者,豈外求哉?此爲頓敎。其間羅舉四眞 一無念無住無修無證之 非有所

道、十善行,訶斥欲染,策發淨業,警世非常,覺諸幻化,此爲漸敎。夫欲染不

之助 世之人,往往貪著有爲,不捨愛欲者,何也?由不知人命無常,世界幻化,以須臾 經言:「佛所言說,譬如食蜜,中邊皆甜。」學者於此盡心焉,則五部諸經,俱可 之樂,招長劫之殃。刃蜜炬風,其言絕痛,苟有丈夫之志者,其可不瞿然深省乎? 去,則淨行難成。淨行不成,則本明不發。故反復於斷愛去欲之修,以爲行道守眞 ,而要歸於無我。了得無我,心垢自盡,常光現前,是則名爲解無爲法。然而

得門而入矣! 一行道人彭際淸書





八大人覺經略解

西土聖賢集

明 蕅益釋智旭解後漢沙門安世高譯

爲佛弟子,常於晝夜,至心誦念八大人覺。 大文爲三:初總標,二别明,三結歎。 今初

言「常於晝夜」者,明其功無間斷。言「至心」者,明其親切真誠。言「誦念」 不論在家出家,但是歸依於佛,即爲佛之弟子。旣爲佛子,即應恆修此八種覺

者,明其文義淳熟,記憶不忘也。「八大人覺」,釋現結歎文中。

二别明即爲八。初無常無我覺。

第一覺悟:世間無常,國土危脆;四大苦空,五陰無我;生滅變異,虚僞 無主;心是惡源,形爲罪藪。如是觀察,漸離生死。

此入道之初門,破我法執之前陳也。

八大人覺經略解

先觀世間無常 ,國土危脆,如高岸爲谷,深谷爲陵等,則於依報無可貪著

滅之法 次以四陰觀心。所謂受想行識,幷此色身,共名五陰。於中實無我及我所,但是生 次以四大觀身 ,刹那刹那遷變轉異。不實故虛,非真故僞,遞相乘代故無主。則於正報無 。地水火風互相陵害,故有四百四病之苦。各無實性故,究竟皆空。

能如是觀察,則身心二執漸輕,即漸離生死之第一方便也。 衆惡之源;一迷四大爲自身相,則形便爲衆罪之藪。倘不直下覷破,害安有極。若 又此正報身心,不惟空愛惜之,於事無益,而且一迷六塵緣影爲自心相,則心便爲

可貪著

二常修少欲覺

第二覺知:多欲爲苦。 生死疲勞,從貪欲起;少欲無爲 ,身心自在

此既以第一覺降伏見惑,次以第二覺降伏思惑也。

思惑雖多, 三知足守道覺 欲貪爲首。能修少欲,則可以悟無爲而得自在矣!

第三覺知:心無厭足,惟得多求,增長罪惡。菩薩不爾;常念知足,安貧

守道,惟慧是業。

此旣修少欲,復修知足,以專心於慧業也。

多欲不知足人,最能障慧。今於少欲之中,又復知足,則慧業任運可進矣!

四常行精進覺

第四覺知:懈怠墜落。常行精進,破煩惱惡,摧伏四魔,出陰界獄

夫所謂少欲知足者,正欲省其精力以辦出要耳!倘託言知足,而反坐在懈怠阬中,

則墜落不淺矣!

故必常行精進,以破見思煩惱。煩惱之魔旣破,則陰魔、天魔、死魔皆悉摧伏,而

五陰十八界獄乃可出也。

五多聞智慧覺

第五覺悟:愚癡生死。菩薩常念,廣學多聞,增長智慧,成就辯才,教化

一切,悉以大樂。

八大人覺經略解

雖云精進,若不廣學多聞,增長智慧,則成暗證之愆

又有聞無慧,如把火自燒;有慧無聞,如執刀自割。聞慧具足,方可自利利他

六布施平等覺

第六覺知:貧苦多怨,横結惡緣。菩薩布施,等念怨親,不念舊惡,不憎

惡人。

雖有智慧而無福德,亦不可以自利利他,故須具行三檀也。

知貧苦之多怨,而行布施,即財施也。知怨親之平等,而不念不憎,即無畏施也。

法施已於上文明之。今以財及無畏,圓滿三檀耳。

七出家梵行覺

第七覺悟:五欲過患,雖爲俗人,不染世樂。常念三衣瓦鉢法器,志願出

家;守道清白,梵行高遠,慈悲一切。

佛,無有不示出家而成道者也。 雖修智慧福 德 ,若不永離居家五欲,終不可以紹隆僧寶,住持佛法。當知三世諸

三衣:一安陀會,二優多羅僧,三僧伽梨也。然使身雖出家,而不能守道清白,梵

行高遠,慈悲一切,則爲竊佛形儀,罪加一等,不可不知

八大心普濟覺

第八覺知:生死熾然,苦惱無量。發大乘心,普濟一切;願代衆生受無量

苦,令諸衆生畢竟大樂。

雖復出家,不發大乘普濟之心,則慈心不周;不發代衆生苦之心,則悲心不切

慈悲周切,方是紹佛家業之眞子也。

三結歎

罪,進趣菩提,速登正覺,永斷生死,常住快樂。 生死苦,捨離五欲,修心聖道。若佛弟子誦此八事,於念念中,滅無量 船,至湼槃岸。復還生死,度脱衆生;以前八事,開導一切,令諸衆生覺 如此八事,乃是諸佛菩薩大人之所覺悟。精進行道,慈悲修慧;乘法身

「如此八事」下十六字,結成名義。

「精進行道」下十六字,結成自覺功德。法身船,指所悟性德。湼槃岸,指修德所

顯也。

「 復還生死 」下三十二字,結成覺他功德。惟自覺,方能覺他也。「 若佛弟子 」下

三十二字,結成誦念功德。能誦其文,必能精思其義;能思其義,必能以此自覺覺

他。故能滅罪而斷生死苦,趣覺而證常住樂也。

八大人覺經略解

蓮

因

寺大專學

生齋

戒學會敬印

佛道教三經解

中華民國八十五年觀音菩薩成道紀念日南投縣水里鄉頂崁村圳頭巷十五之一號

中華民國八十五年観音菩薩成道紀念日本香港ル山目第月本年才到北十五年

并太再學生雅戒學會改印

多然

が、三種



